


ZUBIETATIK

■ Asier Legarda-ereño

Aloisiren falta sumatu aurretik...

Jaitsiera postuetatik bi puntura izan arren, UEFAko postuetatik hirura ego-teak ematen duen lasaitasuna nabari da Iruñean. Deportiboren aurka sekulako jipoia hartu ostean, bajaz jositako Valentziaren aurka garaipena lortzea oso garrantzitsutzat jo zen, baina azkenean golik gabeko berdinketa soilik lortu zuten gorritxoek. Orain, Malagan irabaztearen garrantzia azpimarratzen da.

Eta irabazteko, golak egitea ezinbestekoa dela badakigu. Malagan, taldeak golarekin duen harreman zaila hobetu beharra du. Armentanok eta Rosadok beste aukera bat izango dutela dirudi. Armentanoren gogoia sutsua dela ezin da ukatu, eta Valentziaren aurka partida txukuna jokatu zuela esango nuke. Rosadori ere saiatzen ez denik behintzat ezingo diogu leporatu. Baina bi jo-



MIKEL SAIZ
Aloisi, bere aurkezpenean Sadarren.

kalari hauek hamabi jardunalditan gol bana baino ez dutela lortu ez da ahaztu behar. Are gehiago, ez da ahaztu behar Osasunak behin bakarrik lortu duela gol bat baino gehiago egitea partida batean. Mallorcaren kontrako 4-0koa izan zen. Golak sartzeko arazoak gainditu zirela zirudien, baina harrezkero egun Australiako selekzioarekin den (beste hiru partida galduko ditu) John Aloisik soilik egin du gola gorritxoentzat —Coruñan—. Eta jokaturako minutuen arabera Ligako goleatzaileak eraginkorra den Aloisiren falta sumatu aurretik...

OSASUNA. Yanguasen hutsunea bete dezake

Lekunberri hamaikakora itzul daiteke Malagan

Asier Legarda-ereño | IRUÑEA

Atzo goizeko lan saioan us-tezko hamaikako titular batekin aritu zen Miguel Anjel Lotina, eta zelaian erakutsitakoaren arabera, joko sistema 4-2-3-1ekotik 3-3-3-1ekora alda dezake meñakarrak, min hartuta dagoen Yanguasen hutsunea Lekunberri beteko lukeela.

Dena den, Lotinak ez zuen ezer baieztatu, eta Lekunberri berak ere hasieratik jokatuko duen edo ez, ez zekiela onartu zuen. Lekunberri titularren artean hasi zuen Liga, baina pixkanaka zelai-ko tokia ordezkoen aulkikoarekin trukatzeko hasi zen, eta nahi baino gutxiago jokatzen du aspaldian. Halere, Lekunberri lasai da: «Inori ez zaio gustatzen jarraitasunik ez izatea, baina nik adina minutu jokatu ez dituzten taldeki-

de dezente ditut eta bidegabea litzateke kexatzea». Gainera, jokatzen duenean hainbat postutan aritu izan da Lekunberri, eta horrek ere ez duela laguntzen onartu zuen: «Beti toki berean aritzeak asko laguntzen du, pixkanaka neurria hartzen diotzu jokoari, aldiz postu ezberdinetan aritzea zaila da. Halere, jokatzea da garrantzitsuenak».

«Berdinketa, agian ona»

Partidari dagokionean, Lekunberri baikor azaldu zen, baina garaipenaren bila «ausart eta gogotsu» zelairatuko direla esan ostean «partida amaieran berdinketa ona izan daitekeela» onartu zuen. Dario Silvaren baja dela eta Lekunberri «hobe» izango dela uste du, «iragan denboraldian Aitor Ociori eginikoa gogoratu, bestela».

ALAVES. Jokalariak egoerarekin zuhur dira

Laugarren izan arren burua argi izan nahi du Alavesek

Jon Rejado | GASTEIZ

Lehen Mailan dagoenetik denboraldi hasiera onena egin du Alavesek aurten; 4. da, lehen postutik bi puntura. Gasteizko taldeko jokalariek, berriz, egun bizi duten sasoiaren poztu arren ez dute inolaz ere handinahikeritan sartu nahi. Ivan Alonsok burua argi mantendu nahi du aipatu sasoi onarekin jarraitu ahal izateko: «Ezin dugu ahaztu zein den helburua, eta hori lortzen saiatu behar dugu: mailari eustea», gogoratu zuen uruguaiarrak.

Alonsoren ustez Alavesek orain daukan laugarren tokia ez da ezusteko bat, orain arte

egindako lana oso gogorra izan baita. Denboraldiz denboraldi Gasteizko taldeak gora egin duela deritzo. Hala ere Alavesen historia ez du burutik kentzen Ivan Alonsok: «Orain dela hamar urte Alaves Hirugarren Mailan egon zen, eta hortik egoeraren beste ikuspuntua ematen laguntzen du», adierazi zuen.

Mailari eustea lortzen denean, helburu berriak finkatuko dira, eta ahal bada orain dela bi denboraldi lortutako EUFarako sailkapena errepikatzea: «Denboraldi hasieran Europako txapelketaren batean sartzeko helburua badugu inoiz, egoera larriagoa biziko dugu orduan».

REALA. Irabazteko egokiena nor baino nor jokatzea dela iritzi diote

Txuri-urdirientzat Deportivo ez da horren menderaezina

Barkero eta Aranbururentzat liderrak baditu zenbait gabezia

Jon Balenziaga | DONOSTIA

Jose Javier Barkero eta Mikel Aranburu baikor ageri dira etzi Realak Deportivo liderraren aurka A Coruñan jokatu behar duen partidari begira. Realak, etxetik kanpo jokatu dituen azken bi partidak irabazi egin dituela gogoan dute. Horregatik eta taldea «lanean ongi» ari delako daude itxaropentsu.

«Deportivok behealdeko taldeen aurka galdu egin du. Ez da gaindiezina. Erasora jokatuz, badiugu irabazteko aukerak» esan zuen atzo Barkerok. Mikel Aranburuk ere antzeko iritzia du: «Garaipena eskuratzea oso zaila dela jakinik ere, ez dut inondik inora baztertzen. Athleticetik irabazi zuen». Izan ere, etxetik kanpo horren denboraldi ona egiten ari den talde zuri-gorria izan da orain artean, A Coruñan Deportiboren aurka garaipena erdietsi duen talde bakarra. Etxetik kanpo, berriz, Rayo Vallecano eta Teneriferen aurka galdu du Iruretak entrenatzen duen taldeak.

Aretxabaletakoaren iritziz galiziarren aurka ezin da markagailuri eusten saiatu: «Kalitate handiko jokalariek dituzte eta batek ez bada besteak, gola egiten du. Atzean jokatzeke planteamendua egiten baduzu, hil egiten zaituzte. Horregatik diot nire ustez erasora jokatu behar dugula. Hegaletatik arriskua sortzeko gai gara. Ea gure baliabideak behar bezala aprobetxatzen ditugun». Mikel Aranburuk, berriz, baloiaren jabetza izatean



PABLO S. QUIZA
Jose Javier Barkero Zubietan entrenamendu batean.

JOSE JAVIER BARKERO

Realeko erdilaria

«Deportivok behealdeko taldeen aurka galdu egin du. Ez da gaindiezina. Erasora jokatuz badiugu irabazteko aukerak»

MIKEL ARANBURU

Realeko erdilaria

«Garaipena eskuratzea oso zaila dela jakinik ere, ez dut inondik inora baztertzen. Athleticetik irabazi zuen»

egon litekeela gakoa iritzi dio: «Baloiarekin oso arriskutsuak dira. Zelai erdian presionatzen badugu eta baloia guk izaten badugu, ez dugu garaipena urrutizango».

Realeko erdilariek ez dute uste aurkari handien aurka jokatzen dutenean, kikildu egiten direnik. Mallorcaren aurka

Anoetan jasotako porrotari buruzko hausnarketa egin ondoren, partida hori ahaztu dutela eta Deportiboren aurkakoa baino ez dutela buruan diote.

22na urte izan arren, oso bestelako ibilbidea daramate

Mikel Aranburuk eta Jose Javier Barkerok biek dituzte 22na urte. Hala ere, lehen taldean bat-ak zein besteak daramaten bidea arras desberdina da. Azpeitiarrak hiru partida ezik, gainontzeko bederatziak titular jokatu ditu denboraldi honetan. Aretxabaletakoak, berriz, bi neurketa baino ez ditu jokatu titular, nahiz eta beste zortzi partidetan minutu batzuk jokatu dituen. «Kexatuz, badakit ez dudala gehiago jokatuko. Entrenamenduetan ongi lan egitea da funtsezkoena», zioen Barkerok. Lehen zelai erdian ezkerretik aritzen zen, baina orain eskuinetik edo punta erdi postuetan ere joka dezakeela erakusten ari da. Aranburu, aldiz, gustura dago jokatzen ari denarekin eta ez du uste hamaikakoa tokia egiteko Khokhlovekin lehia estua duenik, taldean jokalaria gehiago ere badirelako.